


公私聞見錄

三



東平公私聞見錄卷之四

○光海廢世子祗有疾疴重自分必不起夢宣祖語之曰汝不亡於此病後幾年不良死殺汝者其某某乎其某者目光海寵姬方用事者也廢世子或慮咀咒置毒而害已光海誤信其寵姬之言以致失國世子竟不良死當日之夢果驗

○光海朝勲臣漢昌君趙國弼夫人柳氏光海主配所妃之姊也反正後削漢昌號降資故以禮示正稱之正於光海朝全盛時多至人家門外門額粉書五字曰終身訓鑒廳八門光海著喪人及下其惡中

而恰似變服隱匿者之狀覺而恠之言于家人而終
不喻粉書之義反正日光浴自枏壽家檐到枏外而
善長服宛然夢中所見也且枏壽業醫方掌計創藥
舖如知粉書五字神明告光海之隱於枏壽家以
終大位也趙正之夢至是乃驗

○丙子之難

仁祖避兵南漢山城丁丑元日夜深

上獨坐忽有人八伏床前僕僕起拜訴哀語多而
聲甚悲語畢仍忽不見而語細故侍者不得聞上
亦終不言其事而天顏不怡者累日及上還都立
下仁城君珙復官之命蓋仁城宣廟朝王子也戊

辰孝立之謀逆也偽舉仁城藉重誑衆上雖知仁城之不與其謀迫於臺官按法之請不得不勉從常懷不安及有是命宮中之人始知元日訴哀者為仁城也

○白沙李文忠公少嘗就友人家居業隣居少女子日來其家出輒仰視公一日友生皆出天大雨公獨坐女復入而仰視公使前問曰汝日來獨視我何尸女人跪曰兒本巫人有所憑神欲謁即君也得先容而不敢白也李公曰即與俱來女人曰不敢晝見至夜雨止月微公張燈以俟之女人曰神至天開戶

視之少年貌玉雪眉目如畫藍袍紅帶冉冉而來公
冠服出迎揖讓而八坐定問曰幽顯路殊何為欲相
見神噓唏曰我王子福城君也遭慘禍家滅抗冤泉
壤欲聞世間公議以為何如而凡人神魄類弱無能
接我者公雖年少他日大貴氣魄能相接其言又足
徵信故願承一言之教耳公曰伸雪久矣豈不聞乎
神曰因祭告知之然此特出於親親之恩所欲聞者
公議也公具道世人所以哀愍其至冤者神泣數行
下曰信然者雖更九死無餘憾矣仍令巫進果數品
遂辭去公又出送之數步而滅公以為近誕終身不

屋非心之意所以能有中興之業云河城 宣廟潛邸時爵號也

○宣廟朝尚方買貂皮于中國造暖帽以進 上御之以接見詔使問曰國王貂帽得無太暖乎 上曰其暖果倍矣詔使笑曰此非貂皮也中國某地產獬毛色與貂相近貴國人被瞞買來而暖甚傷人久則頭痛甚速去之云其時傳語之譯官子有業儒年老者為余道其聞如是

○宣祖在宥有一御史與監司爭坐次高下啓請裁定 上批之曰王人雖微序於諸侯之上御史當居

上久後又有監司與御史爭坐次復啓之 上批之
曰均是奉命之臣一從資級高下可也後廵臣陳達
榻前曰事有疑難者當令該曹議定而 聖批前後
之辭大相逕庭奉行之際莫適所從矣 上曰吾果
率爾後當戒之矣

○宣廟朝有一近侍中官受暇歸鄉列邑多款待而
禮山倅某獨能以法自持定式外無絲毫所加中官
銜之欲以計中之還白於 上曰列邑中某倅待臣
皆如定式而獨禮山倅以臣昵侍 至尊之故遇之
特厚迎候境上親執鄙事光生隣里秋毫皆 上恩

言晚年北謫始為李東岳安訥言之李忠州國憲年十四親聞東岳之言而傳之

○白沙李文忠公

穆陵辛卯年間為承旨公退閒

坐閤者奔告曰一人踵門請謁而衣襤褸狀貌凶獍不敢正視公急正衣冠芟引來其人入著破笠撮弊布衣弊袴甚狹僅周脚脰穿破黑靴面大如盤身長兼一人有半腥臭不可近直入跪公前張赤口咄囁語良久而退公從子鰲山君擢男在夾室驚問故公曰渠自言是白岳山夜叉明年將有大亂而無一人憂之者不勝痛心獨公可以此言聞故來告之云其

明年即壬辰倭寇大至國幾亡公終樹中興大功夜
義言果驗此亦公平生所不言而其後鰲山夫人為
其女姪李大憲敏迪夫人言之故始得聞之

○東平鄭駙馬嘗言余管典牲署以大祭犧牲看品
一年之內赴衙者凡八次路過桃渚洞故朴叅判簾
門前見舊時瓦屋制甚朴陋一日見撤毀而改造之
棟樑柱礎大異前觀又一日見撤毀新家還復舊制
余恠之駐馬而招老人之坐市肆者問其由老人曰
當改構時有災異之可警者而主人不知為神戒無
所改主人頃日之夢其諸先祖會坐祠堂梓八責之

曰吾室甚小而苟且容接許多尊客未嘗為歎爾今改構而廣大之不以先祖之心為心亡吾家必矣命僕隸答醫數十覺則冷汗遍體起而痛哭即日毀之還遵舊樣矣聞之不敢遽信後聞叅判外孫宗室密昌君之言亦如老人之言姜判書覲連姻朴家故又詳聞其事言之

○鄭林塘於宣祖朝陳成三問等六臣死節之事上厲聲曰所謂六臣者何人也林塘惶恐不敢畢其辭至顯宗朝遜臣復有陳啓者上曰三問等乃皇朝方孝孺之類也及今上已未閱武于露梁

左右有言六臣墓在隔江數里許者 上命封其墓

且許後人尊崇之於是薦紳學士爭捐貲構祠於墓
後山麓名曰魯湖祠辛未九月 上謁章陵輦過六

臣墓以褒崇致祭事問議于大臣儒臣至臘月初六
日乃下綵綸曰夫有國之所先務者固莫大乎崇節
獎義人臣之所最難者亦莫過乎伏節死義此古昔
帝王之所以必重節義之士而輒加褒錄者也念彼
六臣豈不知天命人心之不可逆而乃心所事死而
無悔是誠人所難能而其忠節凜凜於數百年之下
可與 皇明方孝孺景清輩同日語矣矧適有事

先陵輦過墓傍於余心尤有所感者噫為親者諱詎
昧斯義而第予之所欲褒者不惟祇為其節義當世
亂臣後世忠臣之教 聖意有在則今日此舉實所以

紹 世祖之遺意光 世祖之盛德也寧有未安之事

乎成三問等六人其令該曹特為復官致祭以樹百代
之風聲其後八年戊寅九月三十日前縣監申奎上
疏請復魯山位號十月二十三日命百僚咸集大庭
議其可否或言可或言不可二十八日 上下教曰
予竊惟 光廟受禪之初尊奉魯山為太上王矣又
命月三行起居之禮矣不幸末梢處分恐非 光廟

本意而究其源則由於六臣也六臣既褒其忠節則
於其故主之追復位號未知其更有嫌碍而 皇朝
景泰之事雖不相類亦可倣而行之矣予以為今茲
追復益有光於 光廟之盛德也噫日者申奎之疏
展讀未半傷感之懷自切於中而未嘗以輕論重事
有一毫不平底意思此所以先詢於遜席者也嗚呼
神道人情不甚相遠無乃 祖宗在天之靈悅豫於
冥冥之中而有此相感之理也以疏遜之臣論至大
之舉可謂千載一時而事竟不行則更待何時乎噫
王家處事自與匹夫不同是以或夫揮乾斷不拘拘

於論議者自古有之矣事苟可行何必持疑其令禮
官亟舉縉儀十一月初六日羣臣議上魯山大君謚
號曰純定安莊景順敦孝大王廟號曰端宗陵曰莊
陵上夫人宋氏謚號曰定順王后徽號曰端良齊敬
陵曰思陵十二月二十五日乙丑上冊寶二十七日
丁卯 上親祭躋主於 永寧殿同日又親臨興政
殿宣教頒赦於中外己卯八月初四日 上親祭思
陵右議政臣李世白東平尉臣鄭載崙為亞終獻思
陵在楊州羣塲里距京城四十里始 宋后之廢置
也托其後祀於 端宗妹子鄭眉壽及薨葬于眉壽

墳山下而眉壽子孫世世繼葬衆塚累累是月初八日掌令魚史徽陳於榻前曰思陵局內鄭家先塋石物之仍存極為不可請令埋之八侍諸臣各陳所見而皆如史徽言上曰久遠墳墓既不可掘移則石物仍置似為無妨故使之仍置矣羣議皆以為不可標石外石物盡為埋置

○中廟在晉陽邸娶慎守勤女為配及靖國時守勤不肯與焉諸勲臣撲殺之中廟臨御後勲臣不能慎氏正坤位極脅上廢置于外宮人心之憤鬱久猶未已顯宗朝侍從臣李端夏陳請建祠宇使慎

家子姓奉其祀而守塚若干人官給祭需至今上

戊寅冬文官申奎上疏請復魯山位號而仍請追復

慎妃位號

上詢問于百官羣議不一而原任大臣

崔錫鼎以為慎妃配體至尊廢出不以其罪而今其

神主久在閭家下同於匹庶之賤終有所未安如令

自官建祠四時差官行祭則庶可以少慰臣民之恨

鬱而亦自不害於春秋大義矣上命立祠于彰義

門內延慶殿傍使內侍守直行祀一如順懷昭顯兩

世子之例上以兩絕句書下海昌尉吳泰周御

製詩其一曰昔在元妃配至尊建春夜出國人冤

惻怛那無追復意奈茲不識 聖心存其二曰為創
新祠祭慎氏千秋不替太常祀義起本由尊奉心傍
人何必證經史

○有老璫以掖庭間流傳之言語人曰 中宗靖國
後見元勲朴元宗柳順汀權位隆重賓客盈門 聖
心不平待之過優專以悅其心為務使掖庭人賞與
珍玩奇著以察其感戴深淺故朴柳兩人釋權謝客
近婦女飲醇酒能得畢命牖下 仁朝靖社後於諸
功臣中特遇數三功臣恩禮非常盖用 中廟故事
而數三功臣不能如朴柳兩臣之覺悟皆不得令終

在古已然之事可為後人將來之戒云

○宣祖常於宮中自歎曰予子雖多所恃者只一孫耳
蓋指 仁祖也又命 仁祖小字曰天胤 聖祖先
見之明可謂高出於百王之上而光海父子因此懷
不平之心 仁祖之得免於禍實天相也全昌尉柳
公建亮言之

○癸亥勲臣之將靖社也衆心皆歸 仁祖而金相
國塗誤聞人言咨且未決諸公謂金公不見天日之
表故不能不動於人言若得一瞻龍顏則必傾心歸
仰使前長洲府使具宏力請 仁祖以微服偕訪焉

金相夫人偶爾窺視待金公八內問之曰來客何人也金相漫應曰鄉儒耳夫人曰昨夢國君臨第與君對坐覺來猶記其顏貌今見來客宛然夢中所見極可恠也金相固竒上狀貌及聞夫人之言益可驚異遂定推戴之議具宏即仁祖渭陽也時在喪中故舉義日起復從軍云具公之子具綾豐仁堅言於人如是

○鄭左相昌衍於宣廟壬午年間在臺閣請祔

神德王后於太廟上不許左相公每以典禮未舉為恨顯廟己酉此論復起三司伏閣陳請時左

相公孫陽坡以首相率百官庭請遂舉縉儀蓋繼述先志也陽坡名太和謚翼憲配享顯廟廟庭

○今上戊午年間尹鑄居宰臣位建請遣官別祭

魯山墓仍擬請追復其位如皇朝追復景恭皇

帝之為者謀諸薦紳大夫莫不心喜下至士庶人無不然人情大可見矣而首相許公積獨以為難兵判金公錫胄問其由許公曰非謂不可但近來東西分黨之後其人敗則必并其言而斥之此論出於尹希仲他日西人復秉政則希仲必受禍若與此事而釐改之則其為傷國體何如也吾心是其論而不為贊

助者以是也希仲尹鐫字也

○廢世子當冠光海將錫名命詞臣必以累十兄弟可以聯名之字命之蓋自期多男也鄭左相昌衍聞而難曰世子其無弟矣主上之預期未然之福殆同秦皇萬世無窮之意此亦不祥兆也

○光海君寵姪金尚宮有妹欲得福祿完備者以歸之光海招集術者于宮中推筭諸文武官之命咸曰新及第金南重武臣宋豈前程不可量光海既聞術士之言又於後日金公以假注書八侍光海見其儀采絕人而又聞其新喪室屢使人勒令作妾金公已

先已卜姓力辭終不承命其女遂歸宋豈豈在癸亥
冬領兵馬隨李适于寧邊及适反被脅偕行而密通
于官軍曰我於夜半當以所領兵往奔須開門以待
之至其時果然 仁祖甚嘉之後豈差光海圍籬別
將上疏曰臣與光海有同婿之義不敢冒疑而行
仁祖教曰宋豈忠義之士豈可以少嫌疑之速令往
赴豈感泣而往金公位至判書二親皆享高年子孫
亦多而年六十八卒于 顯廟朝宋豈官至知中樞
兼都摠管享年九十皆如術者之言

○丁丑講和後清人禁絕我國不得與 皇朝通而

朝廷不忘必東之意密送僧人獨步者從海道輸款
時陽坡鄭相公按關西節與數三大臣主掌之而秘
不洩及獨步之還 皇朝人與之俱朝廷賚以銀蔘
而奸細之徒或與買賣販利其中金春白者現發伏
刑至崇禎辛巳十一月清使到我境得聞漢舡往來
之事招問春白之妻曰汝夫乘何人之舡而與明人
交通乎其妻對以所乘者宣川人舡也而不知其名
見其面則可識云清使盡聚宣川人以舡為業者令
春白妻摘告則指徐起里素曰此是也清使以酷刑
訊起里素使言我朝與漢舡往復狀而且誘之曰若

實告則不死終日拷掠無完膚而起里素閉目不言

清人釋之而去槩漢舡之來糧饌銀蓼之輸給皆用

起里素之舡而渠恐貽禍國家分死不言人莫不嘉

歎陽坡嘗手錄其時事至今上癸亥筵臣有白其

事于上者請褒獎起里素上可之求其子孫則

有起里素者自言其時受罪者即吾父而名論鶴論

鶴以水手隨使舡赴皇都前後幾數十度名播華

夷其時以論鶴告則必尤致清人之疑故以子名換告

納供所謂起里素即我名也老父平生每道其時事

吾亦慣聞云朝廷命贖其子姓之在私籍者為良人

○呂頌相聖齊 國舅西平公之外繼孫而判官韓
斗相乃西平公繼曾孫也呂公登第唱名之日 孝
廟私覲于寢殿曰予之外家零替冠冕不繼汝幸登
第喜不可言汝須顧護韓斗相毋替終始呂公起而
拜命故嘗為斗相地未嘗不惓惓焉呂公之所後母
節死江都時托呂公於 孝廟故 孝廟之特眷呂
公如此云

○孝廟於戊戌落傷之後 玉候未復翌年四月初
二日始乘小轎幸禁苑召諸公子賜坐與語命錦昌
副尉朴泰定近前題詩以進即次韻以賜曰雨後晴

光萬綵新一堂少長是君臣花臺柳榭渾如畫時有
鶯聲喚主人仍諭曰當待九秋紅葉更召之已而曰
後會何可必也 聖心忽愀然不樂侍臣等以為出
於適然明月初四日 仙馭賓天無乃有先知之兆
耳錦昌昭顯世子第二女慶寧郡主駙馬也

○顯廟在春宮未有螽斯之慶 孝廟仔企之甚至
預定小字以待聖孫之誕降及我聖上之載誕 孝
廟已昇遐 顯廟遂以 孝廟所命小字曰龍祥
遵遺意也

○己亥三月二十五日夜

孝廟夢見金自點提劍八

宮若將犯上者 上大聲呵叱始乃退出 上仍驚覺問侍者夜如何其則更鼓四下而大雪數尺滿堦花樹盡皆壓倒折傷

○甲辰四月 顯廟親臨後苑春塘臺別試文武科即日唱榜榜未拆尚設進午膳 上命召諸駙馬公子賜以退膳 上曰今日之科何人當為乎屢言不置其為國家需才之意無異父兄之為子弟待榜既而拆號則司甕直長閔著重為壯元

○乙巳顯廟以眼疾浴于溫陽郡之溫泉命諸近宗及儀賓等侍浴明年又奉 仁宣大妃以幸焉時有

以大梨進供者種其核於行宮牆底其後丁未戊申
己酉連歲行幸輒加培植及壬戌年間東平鄭駙馬
往焉則殿宇閒寂丹雘剥落而其樹之大幾至合拱
矣見塗牕紙有諺書視之曰殿宇如故吾王何去前
庭有木非吾王之手植者乎春回花開吾王何不與
花俱來乎淒涼夜月杜鵑啼血吾心如裂觀其筆跡
則鈍拙僅成字而能識當時事且辭意悲楚必是昔
日掖庭賤隸過去者之所書也

○申執義命圭子孫甚繁人稱福人而其妻乃 仁
宣大妃姨弟也辛亥四月今 上嘉禮時 后命招

八大內陳設衾枕焉至癸丑遷奉寧陵而申以封
陵時董役卽官當被極律臺諫請貸其死上久不
允翌年二月大妃疾大漸語顯廟曰命主之生
死乃朝廷事也予不敢與焉而但念其妻執事於世
子嘉禮之日命主若被刑戮則不能無欠於吉事也
申之得蒙寬典或由於此云

○東平鄭駙馬庚戌奉使燕京路有一女自稱朝鮮
人到門求謁進而問之則名春節後改義英家在漢
城石串里曾為仁穆大妃殿侍女丙子為清將所
擄而其人廣畜姪妾終無嗣續渠以晚進獨生一子

清將大愛之時寵驕妬終被斥黜置之郊庄僅給衣食而其子今已成人得職曰言癸丑間永昌被禍委折及仁穆幽閉西宮以至癸亥反正事歷歷如目覩傍及他細瑣事亦鑒鑒可聽且意仁祖尚在宥曰問安否鄭公為言仁孝兩廟禮陟繼序狀其人垂淚不已及復命仁宣大妃同顯廟賜對以是語達之時有老宮人在傍者聞而泣曰是固大妃殿內人也言其狀貌聲音甚詳

○楂果在中原孝廟甲午乙未間麟坪大君使燕載其樹以還將待其結實而進之九重戊戌大君卒

已亥 孝廟賓天至庚子始結果隣坪諸子獻之
顯廟命薦魂殿茶禮此果始來人思一嘗而不得今
則幾遍國中矣一名冰果

○今 上已巳三月十六日寒食 上親行祀事于
莊烈趙大妃魂殿祭罷百官奉慰忽見月蝕蓋非當
蝕而蝕也人皆異之其四月二十一日 上對臣僚
始發廢妃之意二十五日前判書吳斗寅前應教朴
泰輔等陳疏爭之受拷掠配遠地相繼途死五月初
二日坤殿閔氏遜位于安國坊私第而官供既絕而
兄弟家私備饌羞以供朝夕一日進一活嶋鷄 妃

命放庭中以養之其形漸異久則化為雄鷄庭中玉
梅樹枯已三年忽然開花侍人疑其有異未一年以
甲戌四月十二日復正 坤位縟禮既舉遣使清朝
仍請誥命乙亥正月勅使宣勅還歸 上親餞于西
郊兩使合辭以謝曰荷 國王厚待豈無感祝之言
乎願 國王與中殿共享萬年之福其舍諷勉勵之
意溢於辭色

○今 上甲戌四月初二日南領相九萬起廢復為相
翌年十月疏陳所懷其略曰蓋自甲寅以來朝廷之
變易者屢矣其禍亂之構則皆知其根柢於黨論而

其翻復之機則或言其夤緣於廷略是以其以檢小
害良善者固不足道雖在法當誅者罪人之心未嘗
自服輿人之誦亦多竊議以此鈇鉞亟行於公卿而
紀綱愈不立處分每新於朝廷而人心愈益疑黜陟
靡常禍福無門賤人指高位有如逆旅之傭夫遐荒
視流竄皆若湘潭之卧龍泯泯焚焚雲擾而波蕩旣
不可以威制而力勝又不可以家喻而戶曉向來朝
臣之一進一退有若晝夜之相反春秋之迭代每使
此一邊人議彼一邊人之罪是所謂人方為俎刀我
方為魚肉者也積疑之餘蓄怨之中其處置之不得

其中固其勢然也 上以辭意激切誠極忠款答之

庚申南人或竄或死亦多廢錮李叅判堂揆之卒俞判書夏益以詩挽之曰親朋屈指幾人存半是三危半九原悵悵世間餘老物廣陵殘月又招魂辭意悲楚見者哀之金公壽興壽恒先後大拜俱位上相今上己巳二月南人復秉政二公俱謫遠地仲病卒季有後命其伯都正壽增在村庄挽李判書翊相詩曰牢落人間後死悲更無餘淚及親知青山好葬如君少宜向九原作賀詞令人垂淚不忍再讀己巳春有南人卿宰卒而在殯者未幾朝著變易南人陞擢西

人誅竄李叅判瑞兩挽之曰可憐今日事不使此翁
看後之覽者可想伊時悲忻景像矣

○崇禎丙子之亂金自點為都元帥領兵在外常使
南斗柄為斥堠將丁丑正月二十一日陣于楊根迷
源村忽以他人代之召斗柄語之曰曉夢爾大人乞
余今日改汝斥堠覺來心不能安故以他人代之矣
斗柄泣曰今日是吾父戰亡之日蓋其父宜春君以
興於丁卯之亂死節於安州也是日代斗柄斥堠者
果遇賊死陽坡鄭相公是時為從事官親聞而記之
斗柄後至叅判無御將

○壺谷南尚書龍翼早歲蜚英年二十四以前正言疾甚劇夢中作詩曰絕塞行人少羈愁上客顏蕭蕭十里兩夜度鬼門關不知其何意也至今上辛未十月以己巳年元子定號頒教文中用夢蘭之語論配于明川翌年二月初二日卒于謫所壽六十五旅櫬將發寒雨蕭蕭至十里許始霽而鬼門關距明川不滿四十里前詩乃驗

○湖州蔡尚書裕後與鶴谷洪相國瑞鳳情厚洪公與議靖社欲拉蔡公共其事而不知其意之如何以詩試之曰少日風波畏風波亦已多今宵睡足處

夢唱定風波蔡公茫然不知其意洪公遂不敢告及
勲集蔡始覺之曰我於其時若知其事將何以處之
乎其不能覺乃天相我也

○孝廟友愛母弟隣坪大君大君以戊戌五月逝

孝廟甚悼之隣坪諸子方在次忽有一頭陀俗所謂
居士者自言受大君語詣門請謁諸子恠之使人詰
之答云吾是死而復生者也逢大君老翁則使之傳
意于諸公子曰我雖棄世明年五月初四日當與兄
王相會矣諸子駭之亟令遣去秘不發說而人或
有知者翌年五月初四日 孝廟賓天 顯廟特許隣

坪大君諸子持服入臨諸公子於闕中問此事於麟坪諸胤則言之如是

○今 上庚申春初故麟坪大君第婢往省其族屬於數百里之外忽發狂倍途而來潛踰高墻直入大君祠宇中門內大聲而哭號痛達朝其祠宇在園中隱辟處家人未之知而門外人聞之大駭來告家人始往見之則其女解其衣掛於門外樹枝坐階上窺祠堂而哭甚悲楨柟聞而來見欲縛之其女正色曰我為獐坪夫人吳氏爾母也欲指示爾輩可生之道何反縛我為楨柟曰此胡說也令逐之翌日不知自

何來又坐於祠宇向楨柟家而哭曰我是汝母也朝廷方密謀誅汝而汝輩不知我曾請於列聖及孝廟在天之靈祈追其禍則孝廟謂事機已成不可救解故我遑遑來告於汝曹而尚不覺悟日事將獵以增其過此又何也言訖又哭哭訖又言聲不絕口已而踞坐于牆上作刑訊狀曰汝輩不久將被此刑奈何奈何言訖哭倒于地楨柟聞之使人逐之而任其所往後數月柟因鄭元老上變伏誅弟侄皆流竄而楨賜藥死楨大君弟二子始封福昌君至己巳伸冤復官賜祭甲戌復追奪柟其次也始封福善君

其婢今為完人如不病時人問伊日事則皆不知云

○顯廟辛亥年間咸鏡道得一童子於海濱無人之處年可八九歲而衣服既別語音亦異其所從來茫不可測狀送備局備局令倭譯徐孝男見而問之則侏儻鳥語中間有一二可通處問其土俗則作射獵狀問其來由則作棹船狀似是魚皮獐子之捕魚者泊于我境下陸取物之際卒遇暴風不敢將雛而去也柳大將赫然令授卒伍使之養育而名以繼卜姓之以魚以其為魚皮獐子之種也亦猶曰磾姓金之意云繼卜今為訓局管庫

○癸亥改王後以李适為副元帥出鎮寧邊适辭於
王城張公晚適術士南應敏在傍見之歸言於谿谷
張相曰适必反谿谷問其故應敏曰吾望其氣見其
欲吞長劍者三而不能也已又欲吞短劍者三而又
不能也末乃使吞三小刀向若吞長劍則我國不能
制也吞短劍則未知勝否何居也今止於吞小刀雖
反必見禽矣張公以妖誕呵之之未幾适果反而敗
如應敏之言應敏官至郡守

○海豐君鄭公孝俊未娶時夢有人携往一處指紫
衣夫人曰此為汝配當福汝家海豐覺而心識之既

娶連喪三耦皆無男子年三十七四娶全義李氏卽
水使直卿女叅贊俊民之曾孫也委禽之日默觀其
顏貌衣裳及所居房舍窓櫳庭除宛然昔夢之所覩
者也旣而生五子植弼善楹判書哲樸皆叅判積掌
令植之子重徽亦叅判而皆以文科顯海豐及見其
子孫之顯揚享年八十九卒于顯宗六年世之談
福祿者必首稱焉萬事皆有前定而雜術之士或以
遷改先墓或以祈禳之道擬變其已定之禍福豈非
妄也海豐初室只有二女其長為吳知事翺夫人吳
公親聞海豐之言傳於人

○任叅判義伯常語人曰在下位不可輕論上官長短余於丙子亂後為戶曹郎而李判書湏為判書時有清將索珍品寶釧李公使余督市人覓納累日始得一釧以進則李公受而藏之私室又令更進一口市人大以為怨余亦疑駭妄加醜詆於衆會之處而然不敢違更得一口而大不及於前者李公命遺清將清將猶喜而受之未幾清帝求寶釧甚急李公始以前日所藏者出給仍笑謂余曰即官今猶辱我乎蓋先料清帝之必有求而藏官府或為吏輩所攘仍留私室以待也其料事揣情非凡人所及云

○我太祖開國後賜宰臣宴于政府皆以前朝宰相入仕新朝者也與宴選妓中有雪梅者才貌過人而喜淫特甚政承某醉而戲之曰聞汝朝從東家食暮歸西家宿亦為老夫薦枕否梅歛衽而對曰東家食西家宿之賤軀得侍事王氏事李氏之政丞則豈不宜耶政丞面赤低頭座中唏噓嘿嘿或有墮淚者○柳舍人頴善相人與姜判樞栢年及他文官數十人同隸槐院嘗會公座而姜公素病羸若不保朝夕諸人字號戲之曰叔久今年不死則明年必死安能久於世乎舍人曰君輩勿以某之清弱多病輕視之

也此座盡死後當獨享晚福前頭不可量也諸人皆笑曰妄言也某人壽孰不壽乎後五十年間諸人盡沒獨姜公官一品卒於康熙辛酉正月壽七十九

○宣廟朝 王子仁城君珙遭戊辰禍諸子皆竄配及蒙宥還家蟄處畏縮不畜車馬丙子秋間 仁廟頒賜貢馬受置皂櫓間而無馴擾騎載之事及至臘月十二日西報猝至滿城身竄 上八南漢仁城子海寧君伋將扈從而家中只有此馬乃自韉鞍箝勒而前攫後跳殆不可察而事急無可奈何不得不冒死騎之其馬或躍或驟終能追逐屬車得入山城

仁祖聞其來謂群臣曰仁城之子扈從來到予甚嘉之暨還都首下仁城復官之命繼有仁城諸子付祿之恩撫愛接待終始優厚海寧嘗謂人曰人家禍福豈非天數當時吾輩之復見天日皆由一馬之力也云海寧生於萬曆乙卯壽至七十六有八子諸孫

○潛谷金相國與諸宰語及乙酉歲仁祖擇儲時事曰議儲之初仁廟不示宸斷并舉兩大君諭諸臣曰擇於斯二者此聖祖大失著也幸賴宗廟神靈人無異辭歸於孝廟若使諸臣中或有狂率不擇言者則日後禍福有不可勝言此可為後戒也

○鬱陵島在東海中而距陸絕遠風濤尤險天日清朗之時自江陵三陟等地登高東望則有縹緲三峯隱見於滄波間或稱遠可七八百里或稱數千里終不能指定而海民漁採者往返相屬國家不能知康熙甲戌有魚船數隻往遭倭人倭人誘致其船中舉帆徑還乃謂鮮人犯越我竹島而移送對馬島使達於我朝朝廷謂鬱陵島自是我國所屬 祖宗朝以其水途踔遠民不供役刷還居人而空其地其為我地則明矣而倭人稱為竹島異其名而欲屬其國必遣官搜討其島中土地物產及人民然後可以斥絕

倭人始以前兵使張漢相為三陟僉使率倭譯安慎
徽等百五十人往審之漢相等以甲戌九月十九日
發船開洋二十一日到泊登陸周覽全島則皆石壁
絕立而其中三峯岌嶪特立此則嶺東所望三峯也
山腰以下始為土山而洞壑深邃樹木蔽天路經擁
塞不得入且其土地瘠薄難施農功只有竹田數三
處可以治耕而亦不過三四十日耕云世稱鬱陵島
土地沃饒物產富足鼠大如猫竹可盈抱古有建國
稱君者名以鬱陵島國云者皆浪說也雖以漢相等
所賚圖說觀之合島周遭僅一百五六十里也而南

北七十里東西六十里則已非建國之地民居舊址
又不過十餘處則邑猶不足況於國乎且其所產木
則冬栢紫檀側栢黃檗槐楸桑榆而無桃李松榛櫟
栗禽則烏鴟鵲則猫鼠水族則可支魚穴居巖磧云
俗謂鬱陵島桃核可以為盃而獐鹿成郡者亦浪說
也可支魚無鱗有毛魚身四足而後足甚短陸則不
能善步走水如飛聲如嬰兒取其脂可以燃燈云漢
相等既還倭人亦無發言之端

○趙玄谷緯漢文章為儕流所推嘗直玉堂有學士
省書未竟忽投地曰掩卷輒忘見之何益趙公曰人

之喫飯不能恒留腹中消化為糞而精英之氣自能潤澤身體讀書者亦類乎此見雖輒忘自有長進之效不可以不能記而自棄之先輩以其言為有理云

○人心不同如其面焉縣監李某士人朴某俱娶後妻而兩人之妻皆育於繼母其待之也全無恩愛備嘗艱楚及有所歸李妻則撫育前妻之子女過於已出其死也垂涕而語之曰我有所懲欲得賢繼母之稱而有志未遂沒亦茹恨云朴妻則以其繼母之督已者督責前妻子女至有不保其命者人皆歎其性質之不同矣朝著累變秉權誅竄互相得失而或有

懲於前而緩於後者或有激於前而刻於後者人謂與兩婦人事相類云

○有一長老語人曰鈞者殺伐之物而其以寶稱老尤稟氣烈異不宜蓄之蓄之必有禍黃府尹一皓有一鈞甚寶之一日鈞忽自拔幾至脫鞘隱隱作聲府尹曰使有用之物廢置不得試鬱而為恠如此吾必不免矣後為灣尹以無妄得罪清國清國使我國殺之而遣使蒞斬公以其鈞贈行刑者曰以此殺我恐為汝物從容就命無異平昔見者莫不揮淚 仁祖愍其冤命廩其老母終其身時崇禎十四年辛巳云

○李五峰好閑少時與五六朋儕做業於僻巷空舍
一夕諸友皆歸家公獨坐讀書忽有瓦礫沙石自空
飛下拂面撲衣者無數公苦之俛首俯伏取冊籠以
蓋身須臾有擊籠作聲者曰府院君新來如是者五
六聲公後擢文科封延陵府院君以文章名世受知
宣廟屢典文衡

○朴淵瀑布為松都第一奇觀而冬月成冰之後則
遊客多以松明作炬熱火隱映於冰巖之間赤色照
耀若火龍騰空者有三四宗室別出新意載蘓木幾
馱使寺僧煮而灌之赤水成冰奇恠難狀人謂血瀑

蘇木非我國所產而其浪費如此已非惜福之道而血瀑之名聞者以為不祥後果不免凶禍

○今上丙辰有僧處瓊者到時相筭自稱昭顯世子遺腹子且獻倭菱花紙一片曰我生之初慈氏姜嬪手錄生年月日明以遺之而匿養民間云觀其書則乃諺書而書昭顯世子遺腹子乙酉四月某日生左書姜嬪二字 朝廷見而疑之會諸宰雜治之得其奸狀乃原州邨氓之子也伏刑武庫前路此與成方遂事同姜氏以甲申十月生慶安郡十月之距乙酉四月不滿十朔且姜嬪之稱乃賜死後大內所稱

之辭也非姜氏自稱之語而菱花紙又非宮掖間稀貴之物瓊欲以此藉重以眩人目其村俗愚蠢可知而使之然者乃一公子家女婢也其婢往來山寺與瓊交奸稱瓊為仙風道骨決非凡人之子必龍種也瓊聞此言心喜又因宮女輩習宮禁間說話遂生非分之望以至於此云

○顯廟甲辰年間忠清道人家柿木為風所折劈以薪之中有上下和木四字字法方正如墨寫洪武正韻體者而墨痕深八左右各寸許翌年駕幸溫陽人有持之以來者從官皆得以見之有一文士解之

曰此乃上下和睦之兆也一老帥曰以吾觀之從今
以往朋黨之禍大起上下紊亂終必至於以木相打
吾老不及見公輩自當見之吾言如不中斷吾棺鞭
吾屍可也老帥卽忠兵閔震益時來在 行宮

○甲寅八月

顯廟棄郡臣

大行在殯而忽一夕

有訛言自西至謂有海賊八寇半日之間傳及都城
中外奔避廬舍一空父子奴主之不相待者甚多哭
聲遍滿街巷填咽在外士大夫或有聞難來赴者或
有方帶職而逃避者因此而可卜他日事也

○李爾瞻在光海朝倡為廢

母后之論嘗於公會

語首相朴承宗曰大論旣成則當為錄勲勲號宜稱
顯國矣朴素有心病張目大聲曰顯是現島之現字
耶爾瞻更不得發言蓋顯與現音相近而現島乃方
言露醜之謂也承宗以首相坐廟堂以鄙悖之言慢
辱卿宰見聞俱駭而其斥絕邪論則自有特立不可
犯者矣

○今 上甲戌秋 莊烈王后徽陵陵上有虫形如
躋螭大如手指八土四五寸許食草根草無一莖活
者大臣與諸司官進詣 陵所削去舊土盡捕其虫
然後加以新土改排沙草

○大內熙政堂有池頗深一日諸公主駢立水邊而
曰游水之人能如白鷗沒波云豈人而能然乎有一
宮女在傍曰生長江村素能慣習願試小技卽解衣
投水而久廢之餘運用手足不能捷疾沉入水底諸
主大驚散走急令掖庭僕隸拯出之則已死矣 顯
廟丙午年間也

○大內空殿有矢仰著於椽楣間自外流八者則當
俯著於柱棟窓壁之間而此乃身在屋下仰而射之
者也拔而視之矢有刻名曰摠戎軍官某而軍校中
元無是人時金錫翼為摠戎使知內間有害己者憂

怖縱飲以死乃丙寅二月也年四十二金公即明
聖王后之弟也

○閔公維重在顯廟朝以才諳擢陞至位八座今
上辛酉方長司馬公仲女應選為繼妃正位坤極
遂進爵為驪陽府院君數年後朝廷為慮經費難繼
將欲裁減貢物價而僉議以為非閔公不可俾公掌
其事公感激殊遇不顧一身利害殫竭心力經年方
就為國勞悴誠有人所不及者然而都民太半以貢
物資生恨公裁減怨毒次骨宮中侍女非其姑姊妹
卽其女也於人所不知之中為害實多公以丁卯六

月卒後二年己巳

坤殿出居私第仍奪公封爵至

甲戌 坤殿復位還復公舊號遣近侍祭其墓

○甲寅六月大內熙政堂池中有蓮花并蒂者老璫以為不祥兆而竊憂之時 仁宣張大妃因山纔畢而八月 顯廟又昇遐老璫必有所驗而云也其後己未秋映花堂池中有此異翌年 仁敬王后金氏上賓壬戌秋翠微亭池又有此異癸亥 明聖王后禮陟焉

○今 上壬戌年間唐本佛經漂到全羅忠清海邊而數十冊為一匣外裹油紙故皆無濡濕氣收聚京

師幾至千卷而不可知其所從來其後五六年又有
塗金木佛浮海到濟州牧使李尚齡狀聞朝廷有老
僧聞而憂之曰國俗將變必有先兆此乃佛教大興
之徵也今去壬戌僅卅餘年而宮中之人奉佛甚勤
其親戚之在閭巷者倣而行之競相慕效不惜所費
至有妖人金汝天者寅緣獻術讀七星經于空闕宮
人又與比丘尼之在東胡者締結往來留連無常特
未及剃髮耳近有士子之讀書山寺者多言自 大
內及諸宮送人寺剃燒香燃燈飯僧布施殆無虛月
不知前頭又將何如云前日老儒之言至是果驗

○甲寅換局後尹鑄為掌苑提調其諸子有求梨於貢物下人者及庚申獄起鑄辭連就獄其諸子伏於金吾門外叫号叩地掌苑下人輩望見而嘲之曰何不索梨以洩煩鬱之氣耶有一時宰子招其人嘉獎之所親老吏竊嘆曰下人之察時慢辱士夫其習可惡而不禁反獎許之異日宰相家之遭此變吾知其由於今日嘉獎之言至己巳果有如此事者其言乃果驗也

○丙子亂後 昭顯世子質瀋陽 孝廟在鳳林邸與麟平大君隨焉清帝時邀 世子大君及諸臣從

容款洽出其不意以食餘果餅魚肉急與世子大君以觀倉卒應變之狀而其試孝廟尤多蓋心有所異之也此外他事亦多類此莫可窺測云

○永安尉洪公言 祖宗朝有一後宮每有身輒購巨鯉魚謂大補孕婦而為朝夕膳羞其所生子女或凶或病無一無恙者人以為祟於鯉此可以為後人戒也云

○孝廟末年天安郡守徐抃上變告一隊士大夫推近宗某為不軌宮中鼎沸女侍輩握手號泣及上親鞫事歸無實上杖殺抃蓋於時距癸亥不遠宮

中多有目見反正時事故人心不固驚動如此

○觀象監正朴暉於顯廟壬子年間謂人曰近日

乾象示變歲在甲寅當有白衣之會而從今以往公卿大夫多罹禍網得免者幾希矣至甲寅二月仁宣大妃上仙暉曰恐不止此其年八月顯廟昇遐又於乙卯年間雲南王吳三桂建號改元衆謂燕都朝夕必亡而暉獨曰福德在燕雖百三桂燕必不亡其言果驗

○顯廟丙午年大內巡警內人見通明殿廡有白頭老翁携一小兒而行見而駭之大呼有賊老翁走

八厨房卽命內侍率小璫搜討則封鐫如舊開而點檢則只失乾脯數條煮山蔘數塊始知其為鬼魅也
○甲寅宋相之謫長髻也金吾吏之隨都事押去者欲悅當路人頗有困辱及庚申宋門弟子為金吾卽其吏尚在籍旣施重杖又欲繼杖吏自縊於金吾府中而死曳屍出門又有孔聖廟守僕鐵善者自稱西人而稱南人為彼輩稱尹鐫為賊鐫南人痛入骨髓已巳換局後為師儒之長者猛施臀杖又將移送齋任之所復施嚴杖鐵善自度不能堪自刎而死
○吏部不能盡記朝士履歷必問下吏有數吏當西

人秉政時則某人出入宋政丞門下得賢士稱曾首發請殺尹善道之論儒林至今稱之南人秉政則曰某人以泮儒立異於牛粟從祀之論尹貳相老翁許以強真及其出身又辱宋金兩相大為搢紳所推許云而尊之辱之變於俄頃之間前後銓官皆微笑而樂聞之識者不咎吏而咎前後銓官

○西人文官某招盲卜褰志益論婚事吉凶有客自外而至曰此盲乃狎習於南人政丞某第者也文官聞卽大驚斥而送之聞者駭之其後南人宰相某家婦女以兒少病患招巫女方張祈禳之事而旋聞此

巫獲習於西人某宰夫人遽撤床卓批頰毆出故近
日盲卜亦有西南之目

○今 上庚申四月鄭元老姜萬鉄上變告福善君
桡與首相許積之妾子堅謀不軌朝廷設鞫治之而
首相亦在辭連中其供辭曰臣若與知乎茲豈有丙
辰密奏事乎及獄上 上命勿坐而免為庶人使歸
田里臺諫閱月爭執終不允及捕盜廳以次玉推案
進上始賜死乃其年五月十一日也蓋次玉乃武人
李東耆之女而富譯徐孝男之子婦也有美色堅設
計強奸而秘其迹人不知其誰所為己未正月右尹

南公九萬疏陳其事請令鉤覈秋曹以堅所為上聞而諸臣為堅救解者多終不抵罪又請令捕盜廳改覈而所覈與秋曹同復移禁府更覈則禁府乃謂堅無是事而南既誣罔捕盜大將又搆捏之並竄於遠惡地至是更令捕廳究得則又與己未捕廳推案合上以其時庇護惡子不是之故有後命東平鄭公嘗問金右相錫胄曰許之丙辰密奏事世不能知公或知之乎金相曰丙辰六月二日顯烈王大妃明聖王后尊之疾亟也上却食號泣傷損玉體許以藥房都提調留直闕中排闥獨八大內請上八夾房密奏

曰 殿下無他兄弟而強宗布列所行不遜 殿下
幼冲所賴者惟 慈聖而 慈聖玉候至此 殿下
復誰為恃乎動靜起居必加審慎而饌羞之自外八
來者勿輕進御云余於其時為藥房二提調同在一
處又忝肺腑故得以聞之云至己巳 上命復其官
甲戌又追奪

○中宗朝有武班勲臣官高祿厚而終不要推恩之
典封贈其先又不以因功所得之物供其先祀人問
其故武臣曰吾父儒士也志操廉潔未嘗向人有求
乞言亦未嘗有傷人害物之言交人必擇方正之人

常以此訓戒子孫而吾甚不肖不能奉承父旨多交
雜流雜流中有謀不軌者不得不上變告以正邦刑
吾以是錄功封爵富貴至此而吾之所得皆罪人家
產也有罪者之伏法毫無可惜而延及無辜收司籍
沒無所區別每於月明之時細哭冤號之聲隱隱若
聞於空中想吾父精靈聞此冤哭之聲必不悅於冥
冥之中不以吾富貴為榮故吾既不敢推恩封贈亦
不敢以因功所得享先所以事死如事生不敢違父
志也終其身不變初志人莫不多之云鄭東平 顯
宗朝與趙判書珩伴直揔府以其童稚時聞於長老

者言之如是

○近有一武夫為某邑倅民有爭田者甲是乙非武夫從公決折將及成案有一權宰受乙者賂抵書於倅大示威暴武夫招甲者流涕曰吾不從權宰之言則不能保吾爵不得不知非誤決汝之他日地下訪我於刀山之獄也甲者亦叩育痛哭而退聞者莫不為世道之寒心云

○有一老吏歸自闕中語其妻孥曰近來名官聚會終日所談無一及於國計民憂者只論列邑諸帥所饋多少好否比較彼此曰某帥所送物種頗優某倅

所送某物極精妙名流之評品饋遺如此則外方之
徵歛必增徵歛增則民怨必興民怨興則國安得不
亡垂涕不已時今 上丙子冬也

○宗室清平君佺放浪詩酒不顧家事人問其故清
平曰祖考慶昌君以得於恩賜者歛散取殖獲銀七
萬兩及別紋潞洲紬二千疋其他器物稱是值丙子
清人之亂盡棄之為他人所有我懲此而不事產業
矣其祖考諱珮 宣廟朝王子

○死生吉凶自有天定豈用人力於其間哉檜興君
黃憲之為平安兵使也有相識舌官犯潛商當斬因

繫營獄以俟朝旨黃心愍之欲其全身徑斃使心腹軍校密賫河豚殂日五六饋過十餘日猶不死終被顯戮豈非天耶

○李仁夏為黃海兵使時趙監司世煥以黃州判官在其管下兵使於一營大會時問曰聞判官竊取公庫中某物受某甲賂屈某乙訟且有意逐我貽書京中朋儕誣我不法誠有之乎判官曰下官之事上官於茲有日月矣上官必有酌量下官何敢費辭自明乎惟當引罪而已兵使笑曰此乃偏裨某之言也不然吾何以知之乎其人在座聞之面色如土氣沮不

能舉頭卽辭而歸家蓋兵使欲令他裨更不得行譖也
○強死為厲古人已言之矣金都正克孝為楊口縣
監時晝坐客舍左右適無侍者忽見一人自庭入來
頭着平凉笠身衣布衫直到窓前以手挽金公之手
金公力據門限以拒之故不得出窓外大呼救人吏
輩在門外稍遠久後始來則無所覩矣金公言其狀
吏曰此邑有守客舍者以非辜被殺有時作恠如是
云都正乃仙源清陰兩公之考也嘗戒後輩使不得
獨坐官舍云

○回姐姓崔氏中國山東省青州府壽光縣人也為

同縣四基倉居秀才張九簫妻崇禎壬午十二月二十
十二日被掠於清人翌年六月八 昭顯質館乙酉隨
世子東歸每言明季災異曰嘗有白狗自山而下人
立而言曰天亂天亂人見而尋之則不見又有男子
飛八人家自稱仙人索茶喫之旋卽飛去其飛雖不
能如驚鳬之決然而過於家鷄頭髮編作三條姐親
見之云姐之父曰雲溥為知紅通縣遷家而姐始生
故名之乃天啓乙丑十一月十七日也祖鳴吉外祖
支命山九簫之父名洙泗有嫡子三人九簫其季也
又有庶子二人云姐能畫善綉為人明透無事不解

多有我國人所不及者又有柔姐緊姐皆於甲申燕
都之敗與回姐一時東來而緊姐明朝宰相之後妻
也娟秀善粧梳有士族風味死於丁亥柔姐只解刺
繡死於庚申遺言火葬諸姐皆在宮中而不識文其
姓名籍貫不知為某字只依其口語以方音錄之回
姐沒于康熙乙酉年八十一葬于楊州香花邨屈姐
者中國蘓州府蘓州縣人 皇明宮女也燕都之敗
歸于我東嘗言明季紀綱大壞獻遺公行女子有才
貌者皆為邑倖脅奪以媚權貴或自入己渠母產女
輒殺之渠之初生其外祖母適來取而養之得不死

云姐又云 崇禎皇帝多內寵科道官每以抑後宮
陳戎 帝甚憚之云姐在蘓州時一村皆其同姓而
宮人須廩記書已姓字字頭如尺字狀其音為圭我
國人依其口語以方音之相近者呼為圭姐而不知
其何字錄其言使譯官之赴燕者質諸中國之人乃
屈氏也姐沒有誌墓之文題曰 皇明宮人朝鮮國
尚記蘓州屈氏墓誌叙曰姐姓屈氏中國蘓州府蘓
州縣人七歲入宮侍 孝純劉太后后卽 懷宗皇
帝生母也崇禎甲申三月闖賊陷 皇都已而清人
入滅闖賊仍據而都焉時我 昭顯世子質于瀋陽

清人以姐歸于 世子館遂承顧眄時年二十二是
歲十月 世子嬪生我先考慶安君府君于質館姐
克勤撫護乙酉 世子遷姐隨而東四月 世子卒
姐留宮中事 莊烈王后累拜至尚記乃女官之從
六品也 后薨姐居余家保視余子女甚劬丙子冬
余御命之燕丁丑春返命則姐已以元日歿 上錫
之棺器葬于先考墓山之內乃京畿高陽郡之大慈
洞也嗚呼姐生于閩越長于燕薊卒死于海外偏荒
之土考其終始有足以悽愴而傷心者惟其弱歲克
皇宮下陳遭罹禍故親見天地之反覆而幸以自潔

其身托媵于我禮義之邦蒙國渥恩以考終焉其
視張瓊英王清惠拘幽毳幙自歌其悲恨者相去遠
矣余旣悲姐歿身乎異國又隱其勞于余家也聊記
數語藏諸幽竈庶幾陵谷變易之後見者哀而勿傷
也時皇明崇禎甲申後五十四年丁丑端陽日興
祿大夫宗親府臨昌君無五衛都摠府都摠管焜識
○今上丙寅夏間濟州大洋中有棟樑柱椽平床
窓戶等物漂到濱海之地而神位板二神主位板一
空棺六有屍完柩一同時漂到棺制則稍高於我國
之制而上下盖板及左右板皆無全板並連付以成

之神位板則一書明從仕郎陝西臨洮衛經歷第
六府君神主一書吏科掾吏之神主而皆以朱紅書
填字樣頗大神主板前面富春郡孫守柳靈位而傍
書孝子孫伯仲等奉祀陷中兩行分書壬申歲十一
月初八日生亥時丙子歲四月二十九日死亥時而
棺及神主非栢非松一如濟州所稱真珠木又有塗
金小木佛二坐亦為漂到牧使李尚齡埋其屍柩及
神主於水濱高燥處分送木佛於山寺後狀聞朝廷
翌年丁卯南京蘓州地方漢人張文達等六十五人
漂到濟州朝廷以其船敗從陸送還路過京城人有

以昨年事問之則以書答之云明白聞知山東遭水荒洪漲人家淹沒屍柩漂去者不計其數

○今上乙丑正月九日漢都鍾閣火火照城中士女奔波以觀之丁卯九月三日莊烈趙大妃所御萬壽殿千慶樓火火光燭天照于十里之內都民奔救汲水男女肩背相磨而終不得撲滅盡為灰燼服玩器皿一無所完十月三日恭陵陵上火丁丑十二月二十二日夜章陵陵上火百官以淺淡服各聚其司依禮文滿三日而除戊寅至月二十三日上在慶德宮中殿閔氏殿下御承暉殿自五六日前

有愆候卧于床席是日夜三更有火不知自何處起
已及殿簾又至寢室侍者皆散走而獨有一宮女冒
炎突八背負出門 祖宗朝舊物及 大殿中殿服

御之物盡為燒燼是日百官進慰箋有二宮人飲酒
就眊不及出一人燒死於火中一人爛傷翌日乃死

○廢主燕山君及夫人慎氏雙墳在楊州海等村余
嘗過墓下見其統後之曲墻衛墓之象設一如王子
女禮葬之制燕山墓豎短碣題曰燕山君之墓背刻
正德八年二月二十日葬夫人墓別立一石題之曰
居昌慎氏之墓背刻嘉靖十六年六月二十六日葬

按燕山以正德元年丙寅九月見廢卒于其年十二月而葬在癸酉或者初行權窆之禮至八年而始為安葬于此耶嘉靖十六年卽中宗大王三十二年丁酉也

○今上癸亥青平尉沈公益顯之卒也卜山于高陽石川谷有里人語之曰此洞舊號興青興青卽燕山時妓院之號也或者燕山宮人之葬在此耶及禮葬官治山得誌石三斤其面曰卒麗媛誌石觀其文則果如里人之語沈家子弟遂移壙三尺許葬焉至辛未十月青平之墓移葬于廣州麗媛誌文曰麗媛

姓安氏諱笑霜梅縣監李堅外曾孫父仲山祖不知
曾祖豆產世居原州媛天資雅麗夙有絕代之稱歲
乙丑選入聚紅院恪謹慎淑冠于諸列遂擢蒙聖眷
昵侍近側凡清宴暇豫左右無違忤又善承聖后穆
木之化以助成內治是年八月日以病卒訃聞自兩
宮以至永巷長側無不悲悼追惜上深用軫念命奠
于叢次治喪用一等禮追拜麗人尋加麗媛異數也
擇城西近地得古高陽郡菁川麓丑坐未向之原塋
焉實弘治乙丑十月十九日庚午也嗚呼天不可知
巧賦麗質選入後宮似若輔祐而遽孤隆眷零落丘

山是何意耶寶玉希世艷藥易殞其理也歟精粹或
天滓濁幸延抑其命歟天固不可知矣弘治十八年
十月日謹誌云而不書述者之名不知誰氏之作也
弘治十八年乙丑燕山十一年也

○有僧呂還本推陋無識者而能以妖言惑衆自謂
有天命當王東國愚氓翕然尊信有以女妻之者有
以財奉之者至有身為奴隸恪勤執役者乘肥衣輕
騶從塞路以至日用百物無所不備始自海西遍及
圻甸輦下兵士亦有潛相通信者徒黨幾至數千人
以官爵預許諸人自三公至六部庶司無不排置至

今上戊辰夏自言某日天當降大雨陷沒京都人將
盡劉我當代受天命理裝向京自京迎候于郊外者
不可勝數至其日不雨乃曰天其戲我耳更與其徒
期會他日七月因人上變拿鞫取服伏刑者十數人
而其餘則不能盡誅或竄或放其妻乃殷栗縣吏之
女其黨稱之為龍女夫人亦正法蓋其黨類皆士夫
家叛奴故習見士夫奉養之奢羨歆羨悅慕各欲致
身富貴自以為當得三公六卿八道方伯指日以待
之為國妖變莫此為甚呂還之妻謀逆伏刑後朝廷
以其父緣坐當否議于大臣為其出嫁減死遠配

○僧處宗偽造御寶私粥鬻告身為吏曹吏捕告捕盜
廳發卒搜其裝得偽造守禦使傳令一紙則有聚會
八道僧軍欲為犯闕之意且其末端有語犯至尊之
語而有不忍謗諸文字者朝廷鞫問斬之人心不古
思亂者衆么麼一僧至欲以一紙偽書聚兵作逆豈
不痛心乎今上丙子至月也

○醫官崔有恭嘗言自從己亥孝廟國哀以後一
念耿耿意謂其時若不破腫則或可無事而亦不敢
自信矣厥后七八年有一士夫家婦人患腫邀渠診
視其分野高下腫形大小外色深淺一如御腫渠有

所懲不敢下鍼令塗熊膽牛黃之屬以俟自消蓋游辭也過數十日後啻然自拆聲似冰裂鮮血注射宛如伊日御腫狀至日暮血盡而死始知此症雖有和扁亦不可施術云

○昌慶宮之通明殿古稱見鬼

顯廟丙午丁未年

間仁宣張大妣御是殿宮女高三淑方業伊者為神所憑晝則昏昏不省夜輒携手同往殿上有迎候之狀俄有車馬之聲隱隱於空中一日有大聲曰來汝宮人明聽我言女官皆懼不敢前獨尚宮具氏進伏以俟則空中云云甚多而皆憂歎國家之言也

○癸丑年闕中有鼠妖羣鼠橫挐遍滿於御室至近之地而色白者甚多觀象教授金克晚聞而憂之曰當黑者白則必有喪非喪則且有變矣翌年有仁宣張大妣顯宗大王兩國哀癸亥鄉校洞故金國舅第老婢所畜黑猪產白猪無一點黑色或疑其種之有別詢于金氏子弟則曰舉圜皆是烏猪傍近隣家亦無是種云其冬明聖大大妃昇遐其後故貴主蒼頭家黑猪產五雛而一雛又純白未幾莊烈趙大妃昇遐宮中仍有變易坤位之變庚辰四月有一尾雀舉體純白巢於昌德宮進善門簷尾間辛巳

春南部銅峴里人家烏猪生白猪其色如雪無一毛
不黑蹄甲亦白至八月 仁顯王后昇遐九月有内
獄克晚之言乃驗

○今 上乙亥二月二十八日 上親臨于社稷洞

德興大院君祠宇行再拜禮八廟内奉出昌嬪及大
院君神主以審所題而宣廟王孫檜原君倫朗善君
侃奉祀孫弘逸亦承命陪入 上退御幕次命各加
一資倫陞昭德大夫弘逸陞嘉善大夫又命官弘逸
長子遂除長陵叅奉而侃資級已隆故加其子全城
君混一資為興祿大夫時鄭東平以別雲釧侍衛

○今上丙子七月戶曹吏全宗益造舍於中部洞河城尉橋近傍治基之際得一磁缸中有誥命兩軸一則曰奉天承運皇帝制曰人之大倫莫先於夫婦禮之大節莫重於婚姻此古今之通義也今特命爾陳鳳儀為亞中大夫宗人府儀賓配以寶慶縣主爾尚崇德敦禮克慎威儀毋怠毋驕用昭寵命欽哉一則曰奉天承運皇帝制曰朕聞有天下者必篤親親之義故宗室有女咸有封號所以示貴寵也堂邑王嫡弟一女年已長成特封為寶慶縣主以為宗人府儀賓陳鳳儀之配既歸陳氏之門恪修婦道整肅閨

儀母怠毋驕式勤內助其於父母生身之恩庶幾無
忝焉欽哉皆萬歷十三年四月二十九日所頒也俱
安制誥之寶此誥之流到東土實未可料或者天朝
征倭時陳公隨軍出來方其赴戰也埋置於所寓之
家而陳公則陣沒未還他人則不知其事因此地中
到今始出耶不然而為赴燕商譯輩所賀則是能知
其可寶而深深秘藏以期傳後耶茫乎不識其由

○今 上丙子四月二十日下教曰淑徽公主宿患
沉痾卧床年久矣近日添劇欲一臨視令該曹舉行
遂以二十五日庚戌 車駕臨主第淑安淑明兩公

主亦來會列拜進饌終日怡愉酉時乃還公主家大
設饌供餉近侍多官糜費鉅萬蓋孝廟戊戌臨問
母弟潯坪大君疾上之此行遵故事而主家之餉
從官亦遵故事也十月二十七日淑徽公主卒以丁
丑正月葬高陽三月二十五日上率百官臨哭於
几筵命該曹優給祭需是日有雨摠戎使金重器以
副摠管扈駕使人張雨傘以防雨上至主第洞口
下輦乘轎重器下馬前導持雨傘者於紛沓之中失
重器所在蒼黃尋覓之際不覺御轎在傍傘近
天顏不能數寸上以袖遮之僅免傷焉有司執持

傘者奏當斬 上以其無情特免死定配仍罷重器
職自國初以來群臣從 聖駕者雖遭雨必待 上
下雨具之令然後乃着雨衣而未嘗張傘自近年以
來 上前張傘自成謬例兵判閔鎮長上疏請遵舊制
使於扈輦時不得張傘 上允之閔巷父老聞而喜
之曰不圖今日復見 祖宗朝舊制十二月二十二
日三更淑安公主卒翌朝 上以淺淡服臨哭百官
亦以淺淡服陪從蓋同日夜 章陵陵上火 上方
在變服避殿之中故仍以所變之服御之非為公主
喪變服也已卯二月十三日淑明公主宿病添劇

上玄在慶德宮距主第甚近急以步輦從武德門臨視公主病劇不知上之來臨上察夕還宮翌日

公主所患暫歇三月初四日上又臨問主扶起迎

拜主家以大饌餉侍衛諸臣一如淑徽公主丙子之

例上察夕還宮主復病卧十七日酉時下世翌朝

上臨哭午後還宮

淑徽公主寅平尉鄭齊賢內助
淑明公主青平尉沈益顯內助

○今上甲子春初對馬島倭人貽書禮曹有中國海賊東侵之語中外騷擾多有避亂先往者而京城無賴子結黨相約稱為釁契將劫婦女掠財帛而屠殺士夫語極凶悖朝廷聞而捕治之或死或流配者

甚多

○果川僧義和年幾九十而死嘗言天啓辛酉年間
八京中買海藿以食忽患腹痛甚劇如有物游走者
且有蛙聲出自腹中急使人問御醫陽平君許浚用
五貼藥則有死蛙及蝌斗子并卵洩下者無數病即
愈蓋中盡也川椒八其材料中而其藥名則不能記
○中廟時遂安邑民以盜殺人事覺繫獄旣輸情倅
命使至前使試其事其人即索盆水手叩其盆口嚔
其水俄有數三活鮒撥刺其中此其殺人之具也萬
曆壬辰倭變時有一武夫募得海西善行盜毒者潛

八倭將清正營中朝夕行盜而清正終始無恙盜毒亦有所不能犯者耶金宗瑞之開拓六鎮也藩胡亦害之多設盜毒而終不能售焉云

○朴淵南蠻國人也崇禎戊辰年間漂到我國為人卓犖有識慮所論說往往有高人數等者每言善惡禍福之理輒曰天報之矣其言類有道者淵不解字每以其國方音稱姓名為朴淵而既昧文字語音又別其為姓為名有不可卞姑從我國俗音書之人問其國風土俗尚則曰地甚暖冬無霜雪衣不着錦有時陰霾露下濕衣則故老相言此是中國下雪之日

云又曰渠在邊地不見其國京都不識其君威儀而國法則作賊者勿論輕重必斬故國無盜賊蓋與倭俗同也又曰國有善占候者能知某日風某日雨而毫釐不差航海者必就問而錄之持為節度而渠之行船不遵其旨以致漂流云昔者鄭北窓礪之赴皇都也安南人入中國者持一小冊預占曰候寒暖風雨亦言某日當見東方異人蓋指北窓也南蠻占候者其亦安南人流耶洲在本國時往來販買於日本琉球安南諸國而亦見小人國其人大如中國八九歲兒但頭大如常人善織錦布云又曰在本國時聞

高麗人炙人肉而食之渠之漂到濟州也適值日暮
主倅盛備炬火來審之舟中人皆謂此火必炙我之
具也哭聲徹天久之始覺其非蓋蠻俗夜行皆用燈
火無炬火故也以此觀之我國人之傳言某國如此
之說想可虛傳耳淵來我國雖值嚴冬不穿綿衣曰
在本國習以為性云淵身長體胖碧眼白面黃髯垂
腹見者皆異之淵娶我國女產男女各一人淵死後
不知其存沒也

○宋同春浚吉在 顯宗朝與鄭相公致和將八侍
上前宋公曰 王世子雖在冲年岐嶷夙成講筵日

開而傍無侍讀者依宋朝故事選士大夫子年幼明
秀者侍讀則必有所益故擬於今日建請矣鄭公曰
我國與中國有異使小兒輩八侍則未過數日必大
作游戲日以閭巷猥雜之事聞於春宮非徒無益
終為大害小兒之父兄亦不免無妄之厄矣宋公笑
曰公言似過矣

○某宰愛其族人圖一喫飯處初除屯監次為軍官
又陞邊將南北往來富致萬金資級日高金玉輝映
前後提拔其感益深某宰自謂其人為己死無所辭
而其人意欲無窮冀為好邑太守某宰以太過不從

之其人盡忘前恩反結後恨至有謀害之心形跡綻露又有某宰有族人業儒而老於鄉曲者乞於某宰曰誠得一命之官使鄉人稱為某官則志願畢矣某宰憐之圖除一命之官未久朝家有抄出可用人陞出六品之事其人又請之某宰又圖之如其願而其所以望日加一日終至於力所不及處某宰不能盡從其人讐視之對人言某宰有不臣之言我嘗聞之必欲夷滅其家此外卿相遭此變者非一二蓋其待之之始不能慮終而欲以公器施私恩乃致此禍是誰咎哉

○某官某讀書勤飭人也於今 上乙卯三月罷官

歸鄉築閒遊山弄石尋花遶寺而行脚軟不能前困
卧樹下忽有字號某官者視之只有聲曰君知我乎
某官認其聲音知其為亡友之靈曰幽明已隔今何
呼我神曰我有誠君之語委來以訪耳某官問神人
相感之理神曰其理甚明某官曰若使福善禍淫之
理昭昭不差則人可勸戒而時或有舛何耶神曰善
惡之報自有其時見其終末然後天心可知某官曰
神將以何事戒我神曰朝廷之上局面揆改前年南
人秉軸至庚申西人且復入至己巳南人復入至甲

戊酉人又八而彼八此出之際輒行誅戮死者將不可勝數君不可叅涉於彼此論議自速凶死某官曰神之所言何止於甲戌而不言其後乎神曰君壽至於乙亥其後事亦非君所知也某官曰神言人將多死其人為誰神曰預洩天機天之所惡也吾與君情厚故欲君之謹身免禍為此來告而此已犯罪敢言其他神曰神鬼之以為極罪而必罰不赦者乃面謾君父科場行私枉殺無辜也已或幸免必及後孫君能恒念神鬼之所大惡在此則可得令終保有子孫某官曰復有所教乎神曰豈無可言者神道異於陽

界雖父子間不能盡言遂去不復與言某官聞其言
心竊異之記其語只以示親友某宰更不向人說道
至庚申己巳甲戌其言皆符然後始信神果愛已感
其德也某官以乙亥考終神之言又驗云某宰於丙
辰年間言於一長老云

○一士族家有鬼變於白晝批人頰打人背至捽髮
而曳之侵擾萬端士族家雜施祈禳符咒諸般壓勝
之術而作恠不止時或現形以大聲誚責主人如尊
者之叱奴隸狀士族伏而哀乞曰幽明路殊不宜作
恠如是人依於神神依於人何阨之甚也鬼曰今日

當有善人來此可與言俄而奴八告曰韓斯文來乃韓公浚謙也鬼致敬迎謂曰主人數世積惡而舊習猶存故吾輩承造物者指授多所警責而不思所以改過取以雜術為壓勝之計真愚人也韓公曰古有符籙逐鬼之說誠有此理乎鬼曰不得其死為遊魂則無所憑依或行止於山野或出入於人家此如世間無賴子作挐村間見官人則避匿如此類或不無以符籙壓之之理而吾輩則所承受比如邏卒之承奉官府命令得志肆行者也祈禱不足以為吾輩之喜符籙不足以為吾輩之懼韓公曰然則鬼異何時

已耶鬼曰能祛邪心以正持已則鬼當敬服之不暇
何事侵犯乎不然則必見其禍敗而止耳公是吉人
當作貴人且能知鬼神之理故必待公以告之云全
昌尉柳公廷亮聞韓公女婿鄭叅判百昌之言後言
於人

○光海朝有一朝士色目稱西人者好讀書善作文
而於李爾瞻為戚屬爾瞻以其有文才甚愛之取見
其所著述指導評品至誠勸勉日日為常自至於交
深一日朝官間坐忽有一片白紙寫屢行書者自空
墮下乃其亡父手蹟而先言爾瞻不可交次言歲至

癸亥春則君相皆將易位天地反覆殺運大至汝毋
與其禍朝士驚惧作書告誓誓絕爾瞻仍問所易君
相其誰耶仍置其書於床上達夜不寐伏以俟之俄
有紙又自空墮下其書曰吾憂汝深交尔瞻告以將
來之變以冀免禍也將為宰相者且不敢輕泄而况為
人君者乎汝若預知某公子當為君某人當為宰相
則自不能不動於心難保其邪心之不生吾本欲使
汝謹慎圖生而反使汝妄生邪念向塵埃中有所希
望則其心無異於犯逆天必降殃吾不可言汝不可
問只求不死而已勿出要禍之心朝官敬奉兩紙藏

之篋笥中封緘甚固過五六日後開見則只有白紙
兩幅全無墨痕朝官對親朋則輒說此事流涕被面
柳監司景緝與朝官情親詳知其事言於諸長老云
○南齊高帝建元元年荊州天井湖出綿人用之與
常綿不異康熙庚午冬間上游諸邑如春川楊根等
地有物滿於水上江川池澤無不皆然狀如原紙之
未經搗練者而其色外青內黃水邊居民取著於襦
衣且塗窗壁其禦寒遮風與紙無異天井之綿無亦
此類耶

○宰臣某公一日曉明燭起坐涕淚被面把筆書紙藏

之袖中卽往其先人墓前讀而哭之至夕又哭不止
家人揣知有感愴之夢而莫測其所以也某公卒後
於佩囊中得其書草滿紙皆悔過服罪之言也而蓋
某公於掌試日考試已畢未及拆名始知所親兩人
者不在選中訾毀已八格兩卷屈而去之搜得所親
者卷以充其額見屈兩人乃善文年老鄉人也聞知
是事忿恚成疾未一年而皆死某公後聞其事心甚
不安伊日之夢其亡大人泣而數其罪揮下咎罍如
生人責子者然某公覺而愧悔拜墓而誓誓文中備
述已罪及夢中教責之語故家人始知之云某公女

婿見誓墓文言於張判書善激張公為余言之如是

○一儒生有文名為諸友所推重諸友為之欲其登科者無不用其極一日儒生之亡父夢告于儒生諸友曰爾輩何為吾子欲榮顯乎吾則不願其榮顯後儒生赴庭試之日鬼異大作及入庭所製八高等捷科儒生一家人以考官在闕中試所拆榜之際困憊假寐夢見儒生之亡父憂形于色曰某也衆傍唏噓歎息者五六次其後儒生大顯于朝榮極一世八庚申之獄勘以謀逆用收司之律人始覺科父鬼異前後夢語皆出於戒告也

○顯宗大王末年慶尚道仁同府有丘陵崩頽中有磁缸而缸之外面兩處各書洪武元年四字缺內有紫石牌其大如手掌牌之前面刻領軍牌三字後面刻中國山東馬公之一寶九字又有銀龜在缸中龜背上刻噫此物至三百十年必有用本國土主十五字洪武戊申後三百十年卽康熙丁巳歲也人謂歲到丁巳必有大難皆懷涵惧今過丁巳且三十年天下安寧未知其何說而曾見小說西漢嵩直有神術而自筭其年誤下一筭差了一日則或者埋置此牌之人亦未免誤下耶

○氓俗歌謠出於無心而徃徃有驗於後故歷代史官多備錄而且載之 顯廟末年民間新傳歌謠舂者杵者採桑者無不唱之有數三貴公子因事徃西郊有負薪者歌而過去公子使之前而歌之其歌曰搖之搖之任爾搖搖之轉之轉之任爾轉轉之搖之轉之樂在其中宣惠廳可得廣興倉可得軍資監亦可得矣轉之搖之哀在其中堂峴可徃三水甲山亦可徃矣仍拍手歡呼盤旋起舞而又叩育慟哭掩袂俯伏見者異之知為不祥之兆其後朝著屢變如搖如轉宰相得時或掌宣惠或掌廣興或掌軍資及又

失時誅竄相繼其言果驗蓋宣惠廣興軍資乃國家
藏米之庫名堂峴罪人被刑之所也三水甲山重罪
者竄謫之處也

○役夫呼邪許之聲一人先唱則衆人齊應至凶肆
送葬之流無不皆然蓋所謂舉重勸力之意自十五
六年來人各為聲至作喘促氣盡之狀千態萬狀及
至近日其聲益駭至於轉作俚語為節其語曰蟾也
死乎蛙也為吊客大監何其多如吾後也令監何其
多如犬後也進賜何其多如腐鼠也金圈玉圈如馬
糞銀帶金帶如狗鞵高樓傑閣皆撤毀錦繡珠翠歸

猾吏大監令監求鼠穴不得不如我輩採薪終身飽
蓋我國稱正二品以上曰大監正三品以上曰令監
稱庶官曰進賜而國家仕路旣廣賞職亦濫鑿譯寺
人帶犀者數十人商賈市井之納貨得官者至拜西
樞京兆推恩三代襁褓少兒亦得判決事察訪萬戶
告身千人聚會則稱大監令監進賜者三四百人愚
氓視士夫如武功爵之人公卿之稱大監令監聽如
鑿譯之流名器如土等級紊亂至使樵童牧夫侮弄
朝廷至此可勝痛哉皆撤毀者宰相甲者構室未久
而乙者丙者奪而移構歸猾吏者頃年朝家籍沒宰

相家產有一戶吏潛取竒玩以為己物求鼠穴不得者每當朝著換局之時失時者臨危遑遑置身無所之狀也此雖俚語而可警後世

○顯廟庚戌舌官卜爾輔隨使行至燕京卜有舊識清人之子選為少蝦少蝦者乃清人方言皇帝弄兒之號也爾輔賀之其父搖頭曰伴貴人伴虎蓋以至榮為至懼也

○鄭後啓以鑿術有寵且通卜筮相人等雜技而方為內局首鑿操黜陟之柄時鍼鑿崔有泰年少恃才不遜於後啓後啓嫉之必欲殺之百計為之人皆代

怖曾未幾何後啓盡反前事務加薦揚人問其故後
啓曰閱其才非諸醫之比相其貌推其命皆有貴格
天之所命也一後啓何能殺之不如善待之為愈矣
人謂後啓能達理云後有泰階至一品拜知中樞累
經邑倅為國名醫心服後啓前知每言其事於人有
泰生於崇禎己巳年六十九而死

○宗室完平君名洪德興大院君曾孫也少癖於土
木至白首不懈宗戚卿宰有造室者輒邀問設置之
制完平在少年時先定立中門之處次排外廊以至
僕隸所處至其中年先定建祠宇之所次至中堂及

其季歲先定置側之地次定置祠宇之所以至中堂外廊人詰其先後所見之不同則曰人家園側必得其地然後可無難處之患生世既久閱歷漸多智隨見長而然也聞者許其透得造家之理矣完平歿于康熙癸酉年五十七

○金震發沃川盲人也丙午年間顯廟為莊烈仁宣两大妃進宴震發以笛工上京人聞其善相馬召以試之震發以手捫馬能知齒之老少才之駑駿無毫髮差至卞其種曰健馬雛也濟州馬也澤馬也鄉馬也鑒鑒皆中人異其所為密以震發所騎馬解

鞍易轡廁之諸馬間震發撫而笑曰何瞞我乎此吾馬也傍觀者皆驚異而亦疑其有神憑焉

○顯宗戊申年有李姓大夫遭喪卜山于水原府穿壙四五尺許有橫盤石舉而去之則下有一穴廣可容身而深黑不可測以火燭之則烈風上射火即滅縫石以下則至數百把而猶不止其家惧而弃之終不知其深幾許

○萬曆戊辰間有鄉人遺一犬於宰相曰此咬虎種也人皆笑其妄未幾有捕虎者以木紮縛植立庭中驅出聲犬以試之他犬皆挾尾屏息不敢動獨其犬

超躍以進仰咬虎腎終始不放始知鄉人之言果不誣云余於赴燕時見歷路山峽中有居人養獵狗數十頭日以逐獸為業以資生中有咬虎狗七八遇虎則成隊而或前或後或左或右迭相咬之虎不能支力盡而死

○焰焞廳在東部馬廐橋川邊乃訓局所管而煮取焰焞之所也康熙甲戌三月忽有錢痕印在牆壁團團相連形狀甚奇而常平通寶四字及訓字字畫亦明白以至簷宇棟樑椽楣之間無不皆然所印之痕不知其幾萬或有數日而滅者或有旬日而滅者亦

有經年尚存者其理不可窮其年四月朝著變易訓局大將李義徵初被定配旋又囚訊明年正月竟賜藥死丙子七月義徵獨子進士弘渤又入鞫獄殞於杖下而或曰此事甚恠且在公解則似非義徵一家所能當者云

○士人崔某居在龍山江邊於盛夏與五六友人乘夕沐浴於江水崔忽號曰活我活我諸人以為戲也不之救崔連呼不已漸入深處殆至滅頂諸人始訝之牽出陸地則良久氣定而曰如有物引我不覺身之隨之故我呼以活我而君輩笑而不求幾為水中

鬼也年老漁夫言人之游水者或有如此之時此乃龍之吸氣也值此而精神不足者則不得免居水邊者不可不知也

○有申姓庶派武人為嶺南邊將獵得一大鹿於其腹中得一物賫歸京師其形如鵝卵大可四五倍紅絲細紋縈繞若雀卵文綵粲爛武人以為空青深藏待價其子後有病醫技殫盡欲試用其物破視之有細毛團結盈中更無他異遂棄之又有醫負金由渭者得此物於獐腹而其形差小以手搖之有聲碌碌見者以為空青由渭納之內局國醫亦不知之往質

於中朝博物者皆不識後破以觀之中有細毛及橡實其碌碌者乃橡實動搖之聲也時顯廟丙午年也庚戌使行赴燕時有人騎一鹿而且牽一鹿者招使至前則兩鹿皆雄而其體大於我國之卜馬色純黑以木環穿鼻牽行使行中驛卒平立騎之周步庭中則其負戴馳驟無異牛馬唐畫中有駕鹿之車常以為誕及見此始信其不誣也牽鹿者言以之駕車曳物其力優於載騎云平立亦言前行時見諸王之子小兒以鞍加鹿騎之過市云

○余於庚戌赴燕時多見鸚鵡其嘴有黑者有微黑

帶紅者有紅如珊瑚者蓋雛者嘴黑過三四年則微紅至老始作鮮紅白樂天詩養得經年嘴漸紅者是也有人負櫝携猿而行乃弄猢猻者也使之呈技則其人命其猿曰作關爺像猿入櫝中着蚕眉鳳眼之假面持偃月刀以出又命之曰作張將軍像猿又着燕頤環眼之假面持丈八矛以出以及歷代名將無不皆然睢盱施勇左右超躍皆學其人之為而人或唱歌為欣悅愉樂之事則猿着年少美顏之假面盤旋舞蹈曲盡歡意為悲涼悽楚之辭則猿着老嫗衰削之假面掩巾垂淚作悲哀狀曉解人意亦有人所

不及處良可異也曾見太平廣記有楊子度者以靈砂飼猿變其獸心云未知果然否也又見鴿有白質黑尾而頭有黑毛如碁子大者名為點鳥乃中國所有而我國之所無者也有舌官為貴介公子買得二雙而歸今則孳息漸繁遍滿京外矣

○金主簿某常見人家雉鷄相交有雛為言其形狀聲音甚詳而人頗不信後今上丙辰年間陸璠後立得生雄雉與雌鷄同置一籠卵育甚多諸公子家年少子弟多有求得其雛而養之者其狀雉頭雉尾鷄足鷄身而多雉羽其雄者既不能為角角之鳴而

又不能作鳥鳥之唱真所謂彼此不及者也

○銀工某有愛鷄癖聞主簿朴某家有好鷄以優直取之未久為偷兒所抱去銀工每夜鷄鳴後遍行京城坊曲聽鷄聲尋知其鷄之所在處還取之蓋銀工於鷄聲一經其耳則雖過累年必能卜之千無一錯云時顯廟丁未年間也

○我國以禮義見稱中華而俗習有可駭者一宰相於壬戌八月差祭官將事于園陵祭罷即歸見路邊新塚有富商方行小祥祭者而親戚賓客皆已醉倒棘人着孝服者數至四人而亦大醉賴杖僅立哭

不成聲如哭如歌行路駐觀莫不捧腹又有林姓者
少長於財為其八十兩親預治壽山先定安棺之處
前排床石立石人石柱於左右請其父母曰俗言老
人坐於他日葬已之處鋪饌於床石子弟親戚列拜
進酌如行祭之禮又用鍾鼓絲竹而張之則壽必遠
到父母喜而從之既坐舉樂進饌衆妓齊唱與民樂
老人不勝悲咽挺身起去左右挽止不得終不成宴
云若使中華人見此兩人之為則必將舉一國而謂
無禮義矣我國之人奉使他國者偶見村氓一言一
事而論斷其一國之風俗皆出於妄也

○木槿俗名無窮花詩所謂舜英者也色白者甚罕種千餘子為白者不過十許株餘皆為粉紅色杜鵑花白者甚稀而或生於紅杜鵑叢中亦皆類也濟州柑子山橘柚子所有不少而乳柑唐柚子金橘則僅止三四樹故年年取子種之而及其長成結實則或為枳實或為凡柑或為凡柚千無一成此樹若死則種將絕有中國人言南州橘柚種子而木成本品故方春草芽欲動時斫枳實樹以柑橘枝接而附之一如接桃杏之法則未過三四年茂盛結子不失本品倭人言倭國柑橘取種之法亦如中國云

○白香山閏正月詩曰紅櫻落似震送春詩曰含桃
實已落送春是三月晦日事而其實已落其視我國
櫻桃之熟於仲夏者早晚懸絕心常疑之及見谿公
張公漫筆則以王摩詰櫻桃詩春薦二字為疑至考
月令非仲春乃仲夏之語以明叔孫通顏師古兩人
之誤其所證據不啻皎然余於是尤持前疑康熙乙
丑余得唐櫻桃植之庭中越八年壬申結實而四月
初已爛熟去三月晦日不過五六日矣偏邦地寒之
處猶尚如此則南方溫炎之地其熟必尤先其曰春
薦非誤也始覺摩詰樂天之詩自是實錄而恨此樹

晚來未及見賞於谿谷也櫻桃之義固有所取而我國所產者形圓如芡實故不解其以桃名之之義今見唐櫻桃則其大小與我國之產相近而形微長上曲宛如桃尖始覺其得命由此也且其色純紅其味甘滑不酸蒂長一寸許與山杏同而花葉亦似山杏今則人家多有之矣

○嘗觀古今人家鬼魅之作恠大抵出於變恠而間有警告實欲使其人改過而人不知其可警或謂之獨脚或謂之夜叉惟事辟除而莫知自戒卒至於家敗人亡者多矣在漢霍光妻謀殺皇后有鬼白晝現

形昌邑王無度亦有鬼妖茲皆史傳所載向使兩家
知懼而悛改則不無免禍之道若此類甚衆在本朝
以余耳目所及 宣祖朝王子臨海君好聚雜客善射
者牟利者推命者恒在座上時家有鬼變告戒不已
而臨海以當宁親王子不知人間有畏懼事居之自
如招延無賴光海在東宮常恐他日雜類挾臨海作
變及 宣祖昇遐卽於殯側構成臨海罪殺之蓋雜
客為祟也○光海時士人李成春好遊觀遍踏名山
於辛酉三月使一童僕擔負糧帑芒鞋步行至深山空
寺值日暮不得歸倚壁而睡夜深後於閉戶空室中

有多人笑語聲成春恠之就伏戶外竊聽之始知為鬼語云云甚多不能盡記而語皆評論人善惡以定其生殺也一鬼曰李爾瞻罪逆貫盈而其設計欺君科場行私最是造物之所大嫉一鬼曰諸鬼於尔瞻始謀廢國母科場行私之初示異於其家者凡屢十次而終不改行雖欲其生何以救得其被顯戮期在癸亥三月某日成春歸語一二親族後尔瞻伏刑年月日一如鬼語庶派文官權岱嘗以是事語余且曰果如伊時尔瞻家鬼異大作云而余以其語涉誕恠不之準信他日偶以岱語告張判書善澂張公曰岱

之言誠然成春已於癸亥年前來言於吾家宗老故吾
先君亦嘗聞之云○光海主刑政大亂人心憤鬱有
曷喪之歎其時秉權宰相日以排擊異已為事於是
朝貴之家皆多鬼變而宮中尤多有紙片自空墮下
於光海座前有書曰一室之內盡醉倒更有醒人驚
昏夢又空中有大聲曰西人提劍而起此地非王之
有又於用事戚里家亦有紙片墮下空中作聲之灾
一如告光海之狀而上下皆莫曉其意以西人認為
西夷至為防遏西夷之計至 仁祖反正始知朝臣
色目之稱西人者奉 仁祖改紀也○光海朝國舅

之孫柳孝立以復舊君為名陰謀不軌家有鬼變以
瓦礫投下作聲曰落花無實朽木不青孝立以為夜
叉之戲例皆虛誕不以為懼竟致赤族之禍以上兩
段事柳氏遺老據其先祖所記言之如是○李适在
寧邊內懷謀反人無知者忽有鬼擊窓作聲曰畏哉
畏哉一親密幕裨知為禍兆陽狂逃匿不與其亂及
适伏法之後言於人如是○沈器遠始懷反心家間
猝有鬼變空中有聲曰莫為莫為器遠以為夜叉不
足畏而其妻獨知為凶兆憂懼不已器遠伏法後其
家老婢以其目覩者言於人如是○金自點在 仁

祖朝以元勲大臣權威壓人 孝廟在東宮亦畏其

勢焰未嘗一日放心肆體而自點迷不知懼無所改
行時自點家有鬼變一日空中作聲而墮地片紙上
有書曰不畏所當畏畏生不畏處蓋戎自點謹事儲
位而終不覺悟竟伏滅族之誅有相府錄事親密於
自點家者以其所親見言於人如是○宗室桡全盛
時人有言福善君家有鬼變而非尋常作恠之比有
若長老戎責少年者人聞而異之莫測其家有何等
事以致此異至庚申春桡與逆堅元老軟血同盟事
發皆伏誅逆僭其鬼恠之作正當與堅元老等交通

之曰人始知伊曰鬼異之有所召也又有衆所詳知
可傳為後人戒者故裒錄之而不舉其人姓名稱某
宰某甲某乙蓋遵古人不露郭汾陽之名只稱一品
之例也○宰臣甲與宰臣乙結交甚懽而乙卽人所
指目者也甲乙相逢打話之曰則甲家輒有哭聲鄰
人以為有喪而往視之如是者屢焉然後始知為鬼
哭蓋欲其勿與乙深交也後甲乙兩宰俱死於凶宗
班靈豐君親聞其哭聲言於余○又有秩高兩人好
黨論喜評品人人多欲殺之時兩家皆有鬼異若告
戒者而兩人乃曰何物夜叉乃敢如是不知恤兩人

竟遭慘禍金承旨弔萬言之○又有一貴人家積萬金於公於私所經營無不如意自謂世間無難事無所顧念人皆側目家有鬼異告戒者非一二事而貴人以為鬼雖作恠吾可以壓之亦不之恤竟不良死貴人秩高至親諸人皆言之○又宰臣甲擬上章護黨搆草之際有鬼異宰臣乙新拜將任武士盈庭之日有鬼異兩人不知為懼後皆罹凶而甲禍崇於其疏乙禍崇於將任元摠管德徽語余○又尹姓士人好交雜沅親戚莫不憂之鬼書自空中墮其家者無日無之其書曰雨蕭蕭風瑟瑟人皆欲食尹子之肉

而士人不知為懼後入於妖獄死於楊之下其族人
多言之○又西人名官某方主時論賓客多而廳事
狹欲改構寬敞毀撤之際有鬼飛沙投石南人宰臣
某新秉朝權門庭如市僞從輩嫌其所處湫隘請改
之宰臣自官府多給錢布措置木石擬卜良日而起
役鬼於白晝移其材于數十步之地吏曹老吏安德
厚告余○一戚聯宮禁之人欲以曲逞圖事方經營
賂物之際鬼異大作其人向空大聲曰邪不犯正鬼
敢乃爾自是以後不復作恠其人自喜已能辟鬼而
不改邪心有老奴憂之曰鬼實知其不可再戒故更

不示異而吾主不悟恐禍將不測其家至親亦憂之
言于親朋後遘禍而死○一宰新陞資級擇所繫品
帶鳩聚舊家所藏至六七部而無當意者又欲求於
人展紙作書之際鬼以穢物自空墮下污其紙一宰
戚弟秩高人語余鬼之示異若此者皆所以警告欲
其安分知足不至於敗亡而四人者皆不悟卒至敗
亡○又一士夫欲結懽不可交之人邀致其家而預
戒家人別設酒饌以待之客至將進饌鬼以穢物污
其饌品三易而三污之而士夫不以為懼士夫家老
婢憂之告于其主之姑士夫竟以客故死于凶其後

客亦以是凶死○又仁祖時一文官有文名每科
必主試試期迫近則勞心經營事多陰譎時則必有
咄咄嗟歎之聲出於空中終日不已而文官不悛其
惡於後科又用奸如前後月餘文官及兩子忽發狂
叫呼曰金甲將軍奉天命殺我吾家滅矣日日如是
俱死於一年之內文官之妾後為武官所畜言之如
是武官之友揔管柳汝糧聞其事與余伴直禁中時
言之○又一宰臣臨科當以試官八院欲以所親人
謀所以用奸邪思亂念方煩攪於中忽於其先人祠
宇中有異聲若示戒者而宰臣智昏於利不以為懼

遂行邪後叅科者及宰臣家皆被禍其家狎客目覩
其事告于國舅某公○政院老退吏姓金者於修撰
某家最親 顯廟壬子年間修撰問曰汝於少時亦
嘗弄奸於謁聖庭試之科乎吏曰身為吏胥事有不
得自由者豈無一二行奸而自見驚心之事惡念求
斷天日照燭此心矣問其由老吏曰一名官有文才
而賦性不直臨科而不行奸則心甚癢之與政院吏
甲結為腹心每當庭試謁聖之科使甲密識所親者
試卷字標必用奸乃已故科日迫近則輒有鬼變悲
哭之聲在於屋樑間聞者莫不驚異而名官猶不改

付矣一日空中有大聲名呼名官曰某乎明聽我言
我是政院吏甲之父也神鬼以汝科場行奸論汝罪
擬將先殺汝孫次殺汝子絕其後仍以恠疾病汝辛
苦萬端而命盡汝自有罪宜受其報而吾子以下賤
之故被脅同惡而神鬼亦將降罰比汝罪雖減一等
不絕一縷嗣續而吾子若孫且不免酷禍汝吾之讐
也自此二日一來三日再來輒哭之名官心神恍
惚如癡如狂向空獨語曰吾知吾罪吾知吾罪未久
而其獨孫死又未久而獨子死後遂絕滅又未久而
名官仍得心疾數年而死吏甲往娼家被俠客蹴脅

因而病死未半年其子及孫死只餘一孫而病膝不能起立以疾故不得娶交其婢生一兒亦病啞不能言吾目見此事心安得不驚自是誓於天不復作奸初雖有罪旋覺其非此或可以續前罪而得免凶死耶鄭齋郎某得聞老吏是語以言於來客所親憲府老退吏適立階下聞此語流涕曰吾常於科場有逞奸之事又多見試官行私之跡而以為尋常事矣今聞此語毛骨竦然卽屈指歷數曾前行私之人曰某死於刑戮某流窮荒而死某被訊杖而死某幾斃於杖而幸不死某遭家變不食而死某得恠疾若有人

刺育叫呼乞死而死某之子與孫有狂易之病某之
子死於囚獄某之獨子聚會樵客大設酒肉日以為
常家業蕩盡不堪寒苦飢餓而死其母與妻飢餓繼
死吾始謂適然今因此而竊迹之則無一人得免其
殃始知神鬼之於科場行私降罰如此吾亦嘗累被
毒刑於官長濱死得生常怨官長次骨又屢喪子與
孫常怨天呼哭今乃大覺其此之崇乎若早聞此語
豈不改心易慮以贖舊愆而已無及矣仍向東叩頭
曰天乎日乎吾今以後知吾罪不敢怨天尤人也嗚
咽不成語云爾○譯官某得交一宰臣欲悅其心設

孟盤而享之者一月常二三次每欲候謁宰臣將向
其家之時及設饌將送之際輒有鬼異若戒而止之
者而迷昏不悟後宰臣得罪邦家不良死譯官亦以
其家狎客死于凶譯官切族告余朝著輿局輒有誅
戮被禍之家始皆有鬼異而視為尋常禍至方悟○
光海時有甲者與其族乙俱登科聲名藉甚人皆謂
必為秉權宰相故時人無不請交至於宦官宮妾亦
莫不致款欲為之黨援甲與乙皆循俗不能擺脫世
以大北黨人指目甲忽改其行自貳於乙人莫測其
所以及 仁祖改王乙以罪不得其死甲安保其家

官爵如舊有一相親宰相問曰公在光海時何以知
大北之必凶而能自潔已耶甲曰吾與乙方交大北
諸人時兩家皆有鬼變有老奴告余曰聞老僧之言
持心不正則必有鬼戒無乃吾主近日所為或涉於
不正而鬼以是戒之耶吾聞其言而大悟回心向善
鬼變卽止後一日寵姬金尚宮使其族武人送宮中
珍物以致慇懃余難於退却欲留之鬼忽自空散沙
余覺而不受又一日寵姬李尚宮因譯官之親狎吾
家者送物致款而譯官以不可不受之意縷縷言之
余將強勉受之有鬼擊窓作聲余覺而不受一日寵

宦趙龜壽使內司官親切吾家者送言願交通內外
相助吾未及答鬼投石以警之一近侍宦官請以其
庶族兒為吾儻從鬼亦示異吾皆謝絕之吾與內司
牟利人王命會相知以闕中所得半乾鰕魚絕好者
百箇遺我吾欲受之鬼以穢物污其鰕魚吾驚而却
之李尔瞻以時來訪欲使吾回謝其勢不得不往謝
方韞馬之際鬼飛沙撲馬頭余驚而絕之不復往來
吾之得免於凶禍而保全身命者實賴老奴之一言
而敬奉鬼戎也族乙之不得良死則亦由於不敬鬼
戎也先友柳公景紹聞於其師任疎菴語余○一庶

派人在江上者與諸無賴子為黨各出白金擬將行賂奧密處乃贖奴得七十兩藏之櫝中封鎖甚固以待用時一日開視則無有疑奴偷出反接之將加刑訊有物自空墮下乃其所失銀封也庶派人知為鬼戎悚然改心斥絕無賴子不復相交後諸無賴子皆因此死於凶而庶派人獨得免焉自言於親友○又順治年間有戶曹書吏四五人同謀偷出公財而分之始謀時諸吏家皆有鬼異其中李姓者獨懼而自念曰方謀作奸鬼變如是無乃警我使勿叅涉耶遂辭不與又不受其所分後事覺諸吏皆伏誅而李姓

吏獨得免焉戶曹老吏至今傳說○又一閭家有寡
姬常以裁縫為業親切於一人家其家於今 上已
巳年間猝為貴家嫗為其子希望前頭利益尤加親
結使子晨昏候問如孝子之事親見市上有新物則
輒以厚直取之以獻貴家有所聞語所見事則輒以
告貴家一日方備送新物而有鬼覆其器嫗初不悟
以為出於偶然而更備之鬼又覆之嫗懼而自念曰
貴家將必有禍故鬼戒如此是必我先靈教我也戒
其子絕迹其門嫗亦更不往來後貴家皆死于凶獄
親狎者連逮無得免者而嫗與其子獨安保一貴家

老婢與嫗作鄰知其事告其主凡鬼之作恠在於人邪思方萌之時者欲使人轉惡為善不就滅亡也其作恠在於惡念闖發之後者乃告其禍殃將至必不得免也以此觀之鬼之作恠於人家者皆所以驚動之欲其懼而自改而昧於事理者殊不知改我惡念則鬼變自止但欲以讀經符咒壓勝之術逐而去之是皆惑也宰臣某庶派人戶曹吏裁縫嫗之識見豈不在於霍氏已下諸人之上耶

○一貴公子大起新第於駱峰下自其始役有鬼異及其落成其異尤倍公子使健奴十數夜夜持棒隨作

恠處或驅逐之或詬辱之而其異一樣時公子家婢
病狂夜輒隨鬼而行一日婢傳鬼語曰必擇良材好
構之好構之連為三貴家而後為諸貴人聚宿之所
聞者不能解以為胡亂說今上庚申公子以名八
賊供之故賜藥死家歸勲臣撤移改構時亦有鬼異
至己巳勲臣家遭禍又為時宰移構而鬼異又作時
宰死於甲戌獄自朝家毀其家移構慶德宮之都
摠府為諸宰輪直之所至是人始悟狂婢言之先告
也宗室子一人及賤孽一人皆業武干謁諸貴人
以交構縉紳為能事而有口辯故諸貴人溺愛之而

人曰往諸貴人家獲拜之日則其父貴人家鬼異輒
作在門下者異而傳之故人得聞之自甲寅至甲戌
朝著累變前後遭禍之家甚多而以兩人出入之故
益其禍者凡七家矣兩人後皆伏誅

○凡代大家迭有盛衰出入門下者隨其炎涼以為
趨背主之奴之在於俄頃之間士夫猶然況於市井
無賴之流乎有金尚岱者以賤流少事許及第積得
以起家發身而見其妾子堅所行不良嘗言於人曰
許家之禍朝夕將至及許家敗諸客奔避曰逮捕且
至何不屏跡尚岱曰吾受相國恩人無不知者去將

安適許家有所負公債累百兩以此為憂尚岱傾橐以償之後捕盜大將疑尚岱匿許家財產杖訊之竟死杖下聞者憐之○又有西人士夫事許如父踵門候謁殆無虛日別造蜜果以供之及至庚申凡可以罪許家者無不攘臂居先人皆側目○南人宰相某與金相錫胄交密逮庚申後則慕相國尤倍貽書乞索殆無虛日婚喪疾病凡可以救急者皆於相公家取之○又有一宰與金公情親見金公策勲位隆尤加尊親數數踵門盛稱功業至己巳其兩宰皆據權要恐以前日趨附金相得罪於時議每於廣坐之中

詬詆金相擬掩前日相親之跡人之知其事者皆欲唾其面蓋南人之疾怨相國皆因庚申事彼若絕之則當自庚申始而其絕之乃在於己巳之後則視尚佞當何如耶己巳後又有時宰一人於舊人家背心如兩宰之負金相者云○又有西人朝士為李及第元楨所愛甚得吹噓及庚申及第逮獄其人恐或招謗於時議斥辱及第無所不至其後己巳及第復官判書又贈相職其胤叅議聃命在嶺南起發拜華要其人作書通慫懃厚致饋遺叅議不納而還之聞者代慙

This image shows a blank, aged, cream-colored page, likely an endpaper or flyleaf of a book. The paper has a slightly textured appearance with some faint smudges and discoloration, characteristic of old paper. The left edge of the page shows the binding, with visible stitching or stitching holes. There is no text or other markings on the page.

